

LIGJI NR. 08/L-194**PËR SISTEMIN QENDROR TË EVIDENCËS PENALE TË KOSOVËS**

Kuvendi i Republikës së Kosovës,

Në mbështetje të nenit 65 (1) të Kushtetutës së Republikës së Kosovës,

Miraton:

LIGJ PËR SISTEMIN QENDROR TË EVIDENCËS PENALE TË KOSOVËS**KAPITULLI I
DISPOZITAT THEMELORE****Neni 1****Qëllimi**

1. Ky ligj rregullon sistemin qendror të evidencës penale të Republikës së Kosovës, krijimin e mekanizmave strukturor institucional të sistemit, mirëmbajtjen dhe lëshimin e të dhënave, si dhe procedurën për rehabilitimin e personave të dënuar dhe qasjen në këto informata, përfshirë edhe afatet përkatëse kohore.

2. Ky Ligj është në përputhshmëri me:

2.1. Rregulloren (EU) 2019/816 e Parlamentit Evropian dhe e Këshillit e datës 17 prill 2019 për krijimin e një sistemi të centralizuar për identifikimin e Shteteve Anëtare që mbajnë informacion për dënimet për shtetasit e vendeve të treta dhe personat pa shtetësi (ECRIS-TCN) për të Plotësuar Sistemin Informativ Evropian të Evidencave Penale dhe ndryshimin e Rregullores (EU) 2018/1726;

2.2. Vendimi i Këshillit 2009/316/JHA i datës 6 prill 2009 për Sistemin Informativ Evropian i Evidencës Penale (SIEEP) në zbatim të nenit 11 të Vendimit Kornizë të Këshillit 2009/315/JHA të datës 26 Shkurt 2009 për organizimin dhe përmbajtjen e shkëmbimit të informacionit të nxjerrë evidenca penale ndërmjet Shteteve Anëtare.

Neni 2**Fushëveprimi**

Ky ligj zbatohet ndaj të gjitha institucioneve të Republikës së Kosovës, sistemin gjyqësor të Republikës së Kosovës, i cili mundëson lidhjen e sistemit të të dhënave si dhe autorizimet përkatëse të institucioneve në këto të dhëna si dhe përcakton mënyrën e mbajtjes, përpunimit, shkëmbimit dhe shpërndarjen e këtyre të dhënave nga evidenca qendrore penale për subjektet e së drejtës.

Neni 3**Përkufizimet**

1. Shprehjet e përdorura në këtë ligj kanë këtë kuptim:

1.1. Sistemi i Evidencës Penale (SEP) – struktura qendrore e unifikuar institucionale, e cila menaxhon bazën e të dhënave të personave të dënuar në Republikën e Kosovës, siç

përcaktohet me këtë ligj dhe legjislacionin përkatës në fuqi.

1.2. Evidencë Penale- evidencë nga një regjistër kombëtar që regjistron një vendim të formës së prerë nga një gjykatë penale lidhur me dënimet ndaj personave fizik dhe juridik në lidhje me një vepër penale;

1.3. Certifikata mbi Dënimet Penale - dokument i lëshuar nga SEP për personat fizik dhe juridik, në bazë të kërkesës së tyre apo në bazë të organit tjetër kompetent i cili vërteton të dhënat mbi dënimet e një personi;

1.4. Ekstrakti E1 – dokument i lëshuar nga SEP për qëllimin e procedurave penale, i cili përmban të dhënat e plota të dënimeve, duke përfshirë të dhënat penale të shlyera të dënimit të një personi;

1.5. Ekstrakti E2- Është dokument i lëshuar për qëllime të procedurave administrative, i cili përmban të dhëna lidhur me dënimet e një personi të cilat nuk janë shlyer. Përrjashtimisht, në këtë ekstrakt shënohen edhe të dhënat për dënimet e shlyera, ashtu siç është e përcaktuar me nenin 27 të këtij ligji.

1.6. Dënim- çdo dënim penal të formës së prerë i shqiptuar në procedurë penale nga gjykata kompetente ndaj personave fizik dhe juridik.

1.7. Dosja penale- të dhëna personale mbi kryesin e veprës penale, të dhëna mbi dënimin, vërejtjes gjyqësore, masës së trajtimit të detyrueshëm ose lirimim të kryesit nga dënimi i shqiptuar, ndryshimeve në të dhënat mbi dënimet që janë futur në dosjen penale dhe të dhënave mbi dënimet e mbajtura si dhe mbi shlyerjen e dënimeve.

1.8. I huaj- çdo person fizik dhe juridik i cili nuk është shtetas i Kosovës;

1.9. KGJK – Këshilli Gjyqësor i Republikës së Kosovës;

1.10. Personi pa shtetësi - personi i cili nuk konsiderohet shtetas i asnjë shteti, siç definohet në ligjin përkatës për shtetësi;

1.11. ZEP- Zyra e Evidencës Penale funksionon si njësi e gjykatës së shkallës së parë;

1.12. Procedurë Penale- siç përcaktohet në Kodin e Procedurës Penale.

KAPITULLI II STRUKTURA ORGANIZATIVE DHE KOMPETENCAT E SEP-it

Neni 4 Sistemi i Evidencës Penale

1. Sistemi Qendror i Evidencës Penale të Republikës së Kosovës, funksionon si departament në kuadër të KGJK-së, është përgjegjës për të gjitha çështjet që kanë të bëjnë me evidencën penale në Republikën e Kosovës.

2. Struktura organizative, detyrat dhe përgjegjësitë e departamentit përkatës përcaktohen me akt nënligjor të nxjerrë nga KGJK-ja .

Neni 5 Funksionet e SEP-ut

1. SEP ka këto funksione:

- 1.1. zhvillon, avancon dhe mirëmban bazën e të dhënave që përmbajnë regjistrat e dënimeve të personave fizikë dhe juridikë në përputhje me kërkesat e këtij ligji dhe ligjeve të tjera në fuqi;
- 1.2. menaxhon bazën e të dhënave, në përputhje me dispozitat e këtij ligji dhe ligjeve të tjera në fuqi;
- 1.3. përcakton procedurat për regjistrimin e dënimeve në bazën e të dhënave;
- 1.4. regjistron të gjitha të dhënat penale ekzistuese në të gjitha gjykatat e shkallës së parë të Kosovës në bazën e të dhënave;
- 1.5. regjistron dhe mirëmban dënimet e të huajve nga Gjykatat e Kosovës;
- 1.6. regjistron dënimet e personave fizikë dhe juridikë për shtetasit e Kosovës nga gjykatat e huaja në përputhje me legjislacionin përkatës në fuqi;
- 1.7. lëshon certifikata të të dhënave penale për të gjithë personat fizik dhe juridik që kërkojnë këtë informacion për veten e tyre siç përcaktohet me këtë ligj dhe ligjet në fuqi;
- 1.8. siguron informacione mbi të dhënat penale, me kërkesë të gjykatave, të Prokurorisë së Shtetit, Policisë dhe organeve të tjera të autorizuara nga ligji në lidhje me cilindo person fizik dhe juridik në përputhje me ligjet në fuqi;
- 1.9. shlyerjen e të gjitha dënimeve penale nga baza e të dhënave në përputhje me vendimet në procedurën e rehabilitimit gjyqësor dhe ligjor në përputhje me legjislacionin përkatës;
- 1.10. shkëmben informacione përmes njësisë përkatëse në Ministrinë e Drejtësisë me shtete të huaja, në lidhje me regjistrat e dënimeve të personave fizik dhe juridik, në përputhje me legjislacionin përkatës në fuqi;
- 1.11. zbaton rregulla dhe procedura të tjera të nevojshme për zbatimin e këtij ligji. Procedurat përkatëse do të rregullohen me akt nënligjor të nxjerrë nga KGJK.

KAPITULLI III MENAXHIMI I TË DHËNAVE NË SEP

Neni 6 Mbajtja e evidencës penale

Evidenca penale mbahet në formën e një dosje elektronike si dhe për aq sa është e nevojshme edhe në formë fizike.

Neni 7 Roli i Ministrisë së Drejtësisë në SEP

1. Ministria e Drejtësisë ka qasje të plotë në SEP.
2. Qasja nga paragrafi 1. i këtij neni ndërlidhet me detyrat dhe përgjegjësitë nga fushëveprimi i Ministrisë së Drejtësisë dhe realizohet përmes njësive përkatëse.
3. Qasja nga paragrafi 1. i këtij neni përcaktohet me akt nënligjor të nxjerrë nga Ministria e Drejtësisë.

4. Ministria e Drejtësisë nuk ka drejtë të bëjë ndërhyrje apo intervenime në SEP.

Neni 8 **Siguria e informacionit brenda SEP-it**

1. Regjistri i evidencës penale mbahet në formë të dosjes elektronike dhe ruhet në nivel të lartë sigurie nga çfarëdo dëmtimi apo humbjeje e të dhënave, në përputhje me legjislacionin përkatës, parandalimin dhe luftimin e krimeve kibernetike, dhe legjislacionin përkatës për mbrojtjen e të dhënave personale.

2. Vetëm personeli i autorizuar i departamentit përkatës (SEP) do të ketë qasje për të regjistruar, modifikuar, dhe përditësuar të dhënat në SEP, në përputhje me këtë ligj dhe legjislacionin përkatës në fuqi.

Neni 9 **Vendimet dhe aktet e përfshira në SEP**

1. SEP, siguron që të gjitha dënimet nga gjykatat e Kosovës dhe nga gjykatat e huaja për shtetasit e Kosovës të futen në bazën e të dhënave, të cilat menaxhohen, përdoren dhe shërbehen në mënyrën e duhur, siç parashihet me këtë ligj dhe legjislacionin përkatës në fuqi.

2. Të dhënat në lidhje me dënimin e personave regjistrohen në bazë të vendimeve të mëposhtme:

2.1. vendim i formës së prerë në një lëndë penale nga një gjykatë e Kosovës;

2.2. vendim i huaj gjyqësor i formës së prerë në një lëndë penale kundër një personi fizik apo juridik i cili ka një leje qëndrimi në Kosovë, nëse një gjykatë e Kosovës ka njohur aktgjykimin dënimit, ose ajo njihet drejtpërdrejt në përputhje me marrëveshjet e detyrueshme për Republikën e Kosovës;

2.3. vendim gjyqësor i formës së prerë me të cilin është shqiptuar dënim alternativ apo dënim plotësues;

2.4. vendim përfundimtar i gjykatës për zbatimin e sanksionit në lidhje me një person më të ri se tetëmbëdhjetë (18) vjeç;

2.5. vendimet që rezultojnë nga mjetet e jashtëzakonshme juridike dhe që ndikojnë në dënimet e futura tashmë në bazën e të dhënave.

2.6. anulimi i dënimit të paarsyeshëm;

2.7. njoftimi nga departamenti i ekzekutimit të gjykatës për ekzekutimin e një dënimi në të gjitha elementet e tij;

2.8. vendimi i panelit me të cilin aprovohet kërkesa e liritimit me kusht;

2.9. akti presidencial i faljes së personit të dënuar;

2.10. akti i amnistisë i vlefshëm për personin e dënuar;

2.11. vendim administrativ për rehabilitimin ligjor;

2.12. vendim gjyqësor për rehabilitimin gjyqësor.

3. Masat dhe dënimet për të mitur, siç përcaktohen me dispozitat e Kodit të Drejtësisë për të Mitur pas kalimit të periudhës prej një (1) viti nga data e përfundimit të masës nëse gjatë kësaj

periudhe, nuk i është shqiptuar ndonjë dënim ose masë e re.

4. Vendimi në lidhje me masat e shqiptuara ndaj personave me çrregullime mendore, kur masat e trajtimit kanë pushuar efektet e tyre.

Neni 10 **Llojet e të dhënave në SEP**

1. Llojet e të dhënave të cilat përfshihen në SEP janë:

- 1.1. të dhënat personale të personit të dënuar;
- 1.2. të dhënat për dënimin;
- 1.3. të dhënat për sanksionet penale si dhe masat dhe dënimet e shqiptuara ndaj të miturve;
- 1.4. të dhënat për ekzekutimin e sanksioneve;
- 1.5. të dhënat për rehabilitimin;
- 1.6. të dhënat për falje, amnisti dhe akte të ngjashme pas dënimit që ndikojnë në statusin juridik të personave të dënuar, si dhe të gjitha të dhënat e tjera të proceduara sipas nenit 9 të këtij ligji;
- 1.7. si dhe çfarëdo të dhëna shtesë të ndërlidhura me rastin

Neni 11 **Të dhënat personale të personave fizik të dënuar**

1. Të dhënat personale të personave fizik të dënuar, në bazën e të dhënave ndahen në dy (2) kategori kryesore:

- 1.1. të dhënat e detyrueshme;
- 1.2. të dhënat opsionale.

2. Të dhënat e detyrueshme për tu përfshirë në bazën e të dhënave janë si në vijim:

- 2.1. emri dhe mbiemri;
- 2.2. gjinia;
- 2.3. vendbanimi;
- 2.4. vendi i lindjes;
- 2.5. data, muaji dhe viti i lindjes;
- 2.6. shtetësia;
- 2.7. numri personal i identifikimit (NIP);
- 2.8. emri i mëparshëm dhe NIP, në rast të ndryshimit;
- 2.9. çfarëdo të dhëna shtesë që ndërlidhet me subjektin e së drejtës.

3. Të dhënat opsionale për tu përfshirë në bazën e të dhënave janë si në vijim:
 - 3.1. emri dhe mbiemri i prindërve;
 - 3.2. mbiemri i vajzërisë së nënës;
 - 3.3. nofka;
 - 3.4. çfarëdo të dhëna shtesë që ndërlidhet me subjektin e së drejtës.
4. Në rast të personit fizik të huaj të dhënat në vijim do të përfshihen në bazën e të dhënave:
 - 4.1. emri dhe Mbiemri;
 - 4.2. data dhe vendi i lindjes;
 - 4.3 vendbanimi;
 - 4.4 shtetësia
 - 4.5.NIP, vendi i lëshimit, autoriteti lëshues dhe periudha e vlefshmërisë;
 - 4.6. data dhe afati i lejes së qëndrimit të përkohshëm, siç përcaktohet me Ligjin në fuqi për të Huajt;
 - 4.7. çfarëdo të dhëna shtesë që ndërlidhet me subjektin e së drejtës.
5. Nëse të dhënat personale kanë ndryshuar, duhet të përditësohen dhe të mbahen në bazën e të dhënave.

Neni 12

Të dhëna personale për personat juridik të dënuar

1. Të dhënat e personave juridik të dënuar, të cilat regjistrohen në bazën e të dhënave, janë:
 - 1.1. emri i kompanisë;
 - 1.2. numri i regjistrimit të biznesit;
 - 1.3. selia qendrore e personit juridik
 - 1.4. shkurtesa, nëse është e aplikueshme;
 - 1.5. të dhënat e personit përgjegjës;
 - 1.6. çdo e dhënë tjetër, siç parashihet me Ligjin përkatës për Përgjegjësinë e Personave Juridik për Veprat Penale;
 - 1.7. çfarëdo informacioni shtesë që ndërlidhet me personin juridik.
2. Çdo ndryshim i të dhënave të personave juridikë, duhet të përditësohen në bazën e të dhënave.

Neni 13

Të dhënat e dënimit

1. Baza e të dhënave përmban të dhënat e nevojshme mbi dënimet, duke përfshirë ekzekutimin e vendimit, si në vijim:

- 1.1. të dhënat mbi dënimet;
- 1.2. të dhënat për sanksionet penale si dhe masat dhe dënimet e shqiptuara ndaj të miturve;
- 1.3. të dhënat mbi ekzekutimin e sanksionit;
- 1.4. të dhënat mbi shlyerjen e dënimit të shqiptuar;
- 1.5. çfarëdo informacioni shtesë që ndërlidhet me dënimin.

2. Të dhënat lidhur me dënimin të një personi, përmbajnë elementet si në vijim:

- 2.1. emrin e gjykatës që ka nxjerrë vendimin e formës së prerë;
- 2.2. numrin e lëndës;
- 2.3. bazën ligjore sipas të cilës është dënuar personi;
- 2.4. llojin e veprës penale;
- 2.5. datën kur vendimi është bërë i plotfuqishëm;
- 2.6. çfarëdo informacioni shtesë që ndërlidhet me personin.

Neni 14

Të dhënat e sanksionit

1. Të dhëna mbi sanksionet, përmbajnë elementet e mëposhtme:

- 1.1. llojin dhe detajet e sanksionit;
- 1.2. dënimet kryesore, alternative, plotësuese, vërejtja gjyqësore, masat e trajtimit të detyrueshëm, masat dhe dënimet e shqiptuara ndaj të miturve.

2. Të dhëna mbi ekzekutimin e sanksionit, përmbajnë elementet si në vijim:

- 2.1. datën e pagesës së gjobës;
- 2.2. zëvendësimin apo unifikimin e dënimeve;
- 2.3. datën kur është zbatuar urdhëri për punë në dobi të përgjithshme;
- 2.4. datën e përfundimit të vuajtjes së dënimit me burg;
- 2.5. datën e fillimit dhe përfundimit të vuajtjes së dënimeve plotësuese;
- 2.6. bazën për vendosjen dhe datën e përfundimit të periudhës sprovuese;
- 2.7. datën e fillimit dhe ndërprerjes së trajtimit me masa të detyrueshme psikike ose

masa të tjera të ngjashme;

2.8. datën e faljes, amnistisë, lirimit me kusht apo ndonjë akti tjetër të ngjashëm për personin e dënuar;

2.9. çfarëdo informacioni shtesë që ndërlidhet me sanksionin.

Neni 15

Regjistrimi i të dhënave në SEP

1. Regjistrimi i të dhënave në SEP bëhet në të gjitha gjykatat e shkallës së parë në nivel vendi. Të gjitha institucionet përgjegjëse, janë të detyruara të bashkëpunojnë dhe të ndihmojnë në regjistrimin e të dhënave në SEP. Këshilli Gjyqësor i Kosovës nxjerr akt nënligjor për procedurën e regjistrimit të të dhënave nga ky paragraf.
2. Zyrtari përgjegjës për vendosjen e klauzolës së formës së prerë të vendimit, është i obliguar që në afat prej pesë (5) ditë pune t'ia dorëzojë zyrtarit të SEP-it vendimin përfundimtar.
3. Zyrtari i SEP-it brenda afatit prej tri (3) ditëve të punës, pas pranimit të vendimit sipas paragrafit 2. të këtij neni, regjistron të dhënat e kërkuara në databazë, përveç nëse rrethanat kërkojnë domosdoshmërisht një afat shtesë, por në secilin rast jo më vonë se pesëmbëdhjetë (15) ditë nga dita e marrjes së vendimit.
4. Zyrtari përgjegjës i gjykatës përkatëse, i cili ka mbikëqyrur ekzekutimin e vendimit, brenda pesë (5) ditëve të punës pas ekzekutimit të tillë, i dorëzon të dhënat në lidhje me ekzekutimin e dënimit, ashtu siç parashihet në këtë ligj.
5. Brenda periudhës së njëjtë të përcaktuar në paragrafin 3. të këtij neni, zyrtarët e SEP-it duhet të informohen nga zyrtari përgjegjës për ekzekutim, për skadimin e afatit të parashkrimit për ekzekutimin e vendimit përfundimtar të gjykatës.
6. Zyrtari i Evidencës Penale, është përgjegjës për saktësinë e regjistrimit të të dhënave në databazë. KGJK-ja, nxjerr akt nënligjor që rregullon procedurën e ndryshimit dhe përditësimit të të dhënave në SEP.

KAPITULLI IV

REHABILITIMI DHE SHLYERJA E DËNIMEVE

Neni 16

Rehabilitimi Ligjor

1. SEP është autoriteti që do të marrë vendimin administrativ mbi rehabilitimin ligjor, në përputhje me dispozitat e Kodit Penal të Kosovës. SEP do të regjistrojë bazën ligjore për shlyerjen në bazën e të dhënave dhe teknikisht të shlyejë dënimin.
2. SEP mund të krijojë një proces automatik të shlyerjes për kategori të caktuara të të dënimeve, në përputhje me kërkesat e Kodit Penal dhe Kodit të Procedurës Penale të Kosovës.
3. Shlyerja e dënimeve nga baza e të dhënave do të trajtohet në përputhje me dispozitat ligjore të Kodit Penal dhe Kodit të Procedurës Penale dhe do të përfshijë një proces me dy faza, si në vijim:
 - 3.1. përshkrimi i bazës ligjore për shlyerje në bazën e të dhënave;
 - 3.2. ndryshimi i gjendjes së dënimit në bazën e të dhënave, në dënim të "shlyer".

4. Vendimi administrativ në rastet e rehabilitimit ligjor të dënimeve penale merret nga drejtori i departamenti përkatës pas arritjes së afatit përkatës ligjor si dhe njoftimit të zyrtarit përkatës të SEP-it në Gjykatën Themelore apo në Degë.

5. Njoftimi nga paragrafi 4 i këtij neni, duhet të shpjegohet në mënyrë të duhur dhe duke i 'u referuar përmbushjes së të gjitha elementeve dhe kërkesave ligjore të përcaktuara me ligj dhe të mbështetura nga dokumentet relevante.

6. Në çfarëdo rasti të procedurës së rehabilitimit, departamenti përkatës do të ndryshojë statusin e dënimit në bazën e të dhënave brenda katërdhjetetë (48) orëve pas marrjes së informatës mbi vendimin përfundimtar i cili përbën bazën ligjore për shlyerjen.

7. Ndryshimi i statusit të dënimit në dënim të shlyer duhet të sigurohet me anë të kontrollit të dyfishtë, përkatësisht: nga një zyrtar që ndryshon statusin dhe nga një zyrtar që e aprovon atë.

8. SEP ndërmerr të gjitha veprimet e nevojshme për shlyerjen nga evidenca për veprat të cilat nuk janë më të parapara me legjislacionin në fuqi si vepra penale.

Neni 17 **Rehabilitimi gjyqësor**

1. Pas marrjes së vendimit për rehabilitim gjyqësor, siç parashihet me legjislacionin në fuqi. SEP do t'i marrë veprimet e nevojshme administrative mbi rehabilitimin gjyqësor, siç përcaktohet me dispozitat e Kodit Penal të Kosovës. SEP do të regjistrojë vendimin përkatës gjyqësor për shlyerjen në bazën e të dhënave dhe teknikisht të shlyejë dënimin.

2. Dispozitat e nenit 16 të këtij ligji, sa i përket regjistrimit zbatohen përshtatshmërisht edhe me rastin e rehabilitimit gjyqësor, përveç nëse përcaktohet ndryshe me legjislacionin përkatës në fuqi .

Neni 18 **Të dhënat e rehabilitimit**

1. Të dhënat mbi shlyerjen e dënimeve janë si në vijim:

1.1. data e aktvendimit të formës së prerë mbi rehabilitimin ligjor;

1.2. data e aktvendimit përfundimtar gjyqësor mbi rehabilitimin gjyqësor.

Neni 19 **Pasojat e shlyerjes së dënimeve**

1. Dënimet e shlyera nuk pasqyrohen në certifikatën mbi dënimin penal, të lëshuar nga SEP.

2. Dënimet e shlyera do të ruhen në bazën e të dhënave, dhe mund të përdoren vetëm për qëllimin e procedurës penale (Ekstrakti E1) dhe qëllime të tjera siç përcaktohet me ligj (Ekstrakti E2).

3. Në rastet kur një dënim është shlyer, të dhënat mbi dënimin mund t'i zbulohen vetëm gjykatës, prokurorit të shtetit dhe policisë.

KAPITULLI V QASJA DHE PËRDORIMI I TË DHËNAVE NË SEP

Neni 20 Qasja në SEP dhe regjistrat publikë

1. Gjykatat, Prokurori i Shtetit si dhe departamenti përkatës i Policisë së Kosovës, kanë qasje të drejtpërdrejtë në SEP për qëllime të procedurës penale.
2. Regjistri i dhunuesve seksualë të fëmijëve, të dënuar sipas nenit 227, paragrafi 4., nënparagrafi 4.8. dhe paragrafi 6. të Kodit Penal, është i qasshëm për publikun, përjashtimisht rasteve kur publikimi i vendimeve gjyqësore ndalohet sipas Kodit të Procedurës Penale.
3. Regjistri ngacmuesve dhe dhunuesve seksualë, i cili përfshin kryesit e veprave penale nga Kapitulli XX i Kodit Penal, të cilët janë të dënuar me aktgjykim të formës së prerë më shumë se pesë (5) vjet, është i qasshëm për publikun.
4. KGJK-ja mban regjistër publik për personat nga paragrafi 2. dhe 3. i këtij neni, ku të dhënat përfshijnë emrin dhe mbiemrin e personit të dënuar, vitin e lindjes dhe vendbanimin, të dhëna këto që janë të qasshme për publikun në ueb faqen e KGJK-së.

Neni 21 Qasja indirekte në të dhënat në SEP

1. Të drejtë për të marrë të dhëna nga SEP-i kanë:
 - 1.1. Institucionet kompetente të autorizuara përgjegjëse për ekzekutimin e sanksioneve penale;
 - 1.2. institucionet kompetente të përfshira në procedurën e faljes, lirimit me kusht, lirimin e parakoheshem apo rehabilitimit gjyqësor;
 - 1.3. institucionet përkatëse publike siç janë paraparë me ligj, nëse dënimet plotësuese ose masat e trajtimit të detyrueshëm janë akoma në fuqi në kohën e kërkesës;
 - 1.4. institucionet e huaja dhe ndërkombëtare brenda kornizës dhe në përputhje me procedurat e parashikuara nga mekanizmat dhe marrëveshjet e bashkëpunimit ndërkombëtar që lidhin Republikën e Kosovës;
 - 1.5. institucionet e tjera të themeluara me ligj;
 - 1.6. si dhe përfaqësuesi ligjor apo përfaqësuesi i autorizuar i të miturit.

Neni 22 Kufizimet për përdorimin e të dhënave të lëshuara nga SEP

1. Të dhënat e klasifikuara të përfshira në regjistër trajtohen sipas Ligjit përkatës për klasifikimin e informacioneve dhe verifikimin e sigurisë.
2. Të dhënat nga paragrafi 1. i këtij neni për dënimin penal mund të përdoren vetëm për qëllimin për të cilin është lëshuar.

Neni 23**E drejta për të pasur qasje në informacionin personal të mbajtur nga autoritetet publike për qëllimet e Ekstraktit E1 dhe E2**

1. Subjekti i të dhënave apo i autorizuari i tij ka të drejtë të ketë qasje në përmbajtjen e Ekstraktit 1 dhe 2 në prani të zyrtarit përkatës të regjistrit.
2. Përmbajtja e ekstraktit nuk mund të fotografohet, kopjohet ose në ndonjë mënyrë tjetër të riprodhohet.
3. Kopja asgjësohet nga zyrtari përkatës në prani të subjektit të të dhënave apo të autorizuarit të tij. Zyrtari përkatës mban shënim për ekstraktin e asgjësuar dhe e regjistron atë në sistem.

KAPITULLI VI**NIVELET E EKSTRAKTEVE NGA REGJISTRI I EVIDENCËS PENALE****Neni 24****Nivelet e Ekstrakteve**

1. Departamenti përkatës sipas kërkesës së organit publik të autorizuar, lëshon informatë mbi gjendjen penale të personit në formë të ekstraktit të gjendjes penale, në përputhje me Kodin Penal të Kosovës dhe legjislacionin përkatës në fuqi.
2. Përveç certifikatës, departamenti përkatës lëshon dy lloje të ekstrakteve të dënimeve penale, përkatësisht Ekstraktin E1, për qëllimet e procedurave penale dhe Ekstraktin E2, për qëllimet e procedurave administrative.

Neni 25**Certifikata mbi dënimin penal**

1. Certifikata mbi dënimin penal lëshohet sipas kërkesës së personit fizik apo juridik. Certifikata merret online, apo në formë fizike në çdo gjykatë të shkallës së parë apo degë të gjykatës në tërë territorin e Republikës së Kosovës, pa marrë parasysh vendbanimin apo vendqëndrimin e personit që kërkon certifikatën e tillë.
2. Certifikatën nga paragrafi 1. i këtij neni, personi mund t'a merr personalisht apo përmes përfaqësuesit të tij/ saj ligjor apo të autorizuarit me prokurë apo autorizim.
3. Certifikata mbi dënimin penal shërben për nevojat e personave fizik dhe juridik, për të dëshmuar të kaluarën penale në raport me autoritetet publike apo private apo për çfarëdo nevoje tjetër të personit në fjalë.
4. Në Certifikatën mbi dënimin penal shënohen vetëm dënimet e formës së prerë të cilat nuk janë shlyer.
5. Certifikata mbi dënimin penal nuk përmban asnjë informacion për lëndë apo procedurë penale që është në zhvillim e sipër pranë ndonjë gjykate në Kosovë.
6. Informatat që përfshijnë të dhënat personale të mbrojtura, nuk vendosen në certifikatë.
7. Certifikata mbi dënimin penal lëshohet në gjuhën shqipe dhe serbe.
8. Certifikata mbi dënimin penal i dorëzohet personit në momentin e aplikimit brenda një afati sa më të shpejtë kohor dhe pa asnjë vonesë, duke u bazuar vetëm në të dhënat që ekzistojnë në bazën e të dhënave penale.

9. Certifikata mbi dënimin penal është e vlefshme për tre (3) muaj nga data e lëshimit.

10. Përmbajtja dhe dizajni i certifikates dhe ekstraktit E1 dhe E2 rregullohet me akt nënligjor të nxjerrë nga KGJK.

Neni 26 Ekstrakti E1

1. SEP-i sipas kërkesave të institucioneve përkatëse të drejtësisë dhe sigurisë lëshon Ekstraktin E1, i cili përmban informacione për të kaluarën penale të personave të dënuar, përfshirë këtu edhe të dhënat për dënimet e shlyera konform rregullave dhe kufizimeve të përcaktuara në Kodin Penal të Republikës së Kosovës.

Neni 27 Ekstrakti E2

1. SEP-i lëshon Ekstraktin E2 sipas kërkesave të Institucioneve Shtetërore. Ky ekstrakt përmban vetëm të dhënat mbi dënimet të cilat nuk janë shlyer.

2. Përjashtimisht nga paragrafi 1 i këtij neni, të dhënat për dënimet e shlyera në Ekstraktin E2, mund të zbulohen vetëm për punësimet në pozita specifike, si puna me fëmijë në institucionet arsimore publike, institucione të tjera publike nga fusha e sigurisë, të mbrojtjes dhe të drejtësisë, si dhe për personat që aplikojnë për armëmbajtje me leje.

KAPITULLI VII PROCEDURA PËR LËSHIMIN E CERTIFIKATAVE MBI DËNIMET PENALE

Neni 28 Kërkesa për të dhëna nga SEP

1. Kërkesa e personave fizik për certifikatë përmban të dhënat si ne vijim:

1.1. emri dhe mbiemri;

1.2. data e lindjes dhe numri personal i personit për të cilin kërkohen të dhënat;

1.3. dokument identifikimi.

2. Kërkesa e personave juridik për certifikatë përmban të dhënat si ne vijim:

2.1. emri i biznesit dhe numri i regjistrimit të biznesit së entitetit juridik për të cilin kërkohen informatat;

2.2. emri dhe numri personal i aplikuesit;

2.3. autorizimi i personit përgjegjës të personit juridik.

3. Kërkesa e informatave e bërë nga autoritetet kompetente në lidhje me procedurën penale apo në raste të tjera siç është rregulluar në ligjet revelante, bëhen në formën e përcaktuar nga KGJK. Kërkesa duhet të përmbajë të gjitha informatat siç janë të rregulluara në paragrafin 1. dhe 2. të këtij neni. Kërkesat duhet të përmbajnë arsyetimin që pasqyron bazën ligjore për të drejtën për të marrë informata, siç është rregulluar në ligjin përkatës në fuqi.

4. Forma e kërkesës nga paragrafi 1. dhe 2. të këtij neni përcaktohet me akt nënligjor të nxjerrë nga KGJK.

KAPITULLI VIII ARKIVA DHE MBROJTJA E INFORMACIONIT NË SEP

Neni 29 Siguria e të dhënave

1. Siguria e të dhënave të futura në SEP duhet të mbrohet, në përputhje me standardet më të larta të Sigurisë.
2. Funksionimi i SEP-it në lidhje me arkivimin do të bëhet sipas legjislacionit përkatës në fuqi. SEP do të arkivojë vendimet administrative për shlyerje.
3. Vetëm personat e autorizuar me këtë ligj mund të kenë qasje dhe të përdorin të dhënat në kuadër të SEP-it.
4. Secilit përdorues i jepen kredencialet përkatëse për qasje në aplikacion konform detyrave dhe përgjegjësi.
5. SEP-i siguron që regjistri i evidencës penale të përditësohet, zhvillohet, mirëmbahet dhe monitorohet gjatë gjithë kohës dhe harmonizohet me ndryshimet e realizuara konform legjislacionit në fuqi.
6. SEP-i siguron që regjistri i personave të autorizuar të përditësohet, zhvillohet, mirëmbahet dhe monitorohet gjatë gjithë kohës dhe harmonizohet me ndryshimet e realizuara konform legjislacionit në fuqi.

KAPITULLI IX LËSHIMI I RAPORTEVE STATISTIKORE NGA SEP-I

Neni 30 Procedura për sigurimin e informacionit statistikor

1. Të dhënat nga SEP të ofrohen për qëllime të hulumtimit ose punës statistikore në përputhje me kushtet e përcaktuara në Ligjin përkatës për Mbrojtjen e të Dhënave Personale.
2. Të dhënat sipas paragrafit 1. të këtij neni, do të ofrohen ne baze të kërkesës e cila përmban të dhënat si në vijim:
 - 2.1. të dhënat personale të aplikantit;
 - 2.2. qëllimi i të dhënave;
 - 2.3. nënshkrimi i aplikuesit.
3. Të dhënat e kërkuara sigurohen nga zyrtari përgjegjës i departamentit përkatës brenda afatit prej dhjetë (10) ditëve.
4. Të dhënat e mësipërme mund të publikohen edhe për qëllime të informimit të publikut në baza periodike javore, mujore, vjetore.

Neni 31 Lëshimi i certifikatës mbi dënimin penal

1. Shkëmbimi i të dhënave mes institucioneve dhe shpërndarja e të dhënave bëhet pa pagesë.

2. Certifikata mbi dënimet penale lëshohet pa pagesë për personat juridikë dhe fizikë.

Neni 32

E drejta për të kundërshtuar dhe kërkesat e palëve në lidhje me parimin e mbrojtjes së të dhënave personale

1. Nëse personi konsideron se të drejtat e tij janë shkelur ose kufizuar dhe të dhënat personale janë shpalosur në kundërshtim me dispozitat për mbrojtjen e të dhënave personale, ai ka të drejtë të ankohet në përputhje me dispozitat e Ligjit përkatës për Mbrojtjen e të Dhënave Personale.

2. Ankesa paraqitet pranë organit përgjegjës për SEP-in dhe më pas procedohet te Agjencia për Mbrojtjen e të Dhënave Personale, në përputhje me dispozitat e Ligjit përkatës për Mbrojtjen e të Dhënave Personale.

Neni 33

Procedura për shlyerje nga regjistri i evidencës penale

1. Palës të cilës nuk i është shlyer dënimi sipas afateve ligjore, ka të drejtë që të kërkojë shlyerjen e dënimit nga baza e të dhënave.

2. Kërkesa për shlyerje të dënimit sipas paragrafit 1. të këtij neni i drejtohet KGJK-së, përmes zyrtarit të evidencës penale të shkallës së parë të gjykatës përkatëse.

3. Departamenti përkatës në KGJK, brenda afatit prej pesë (5) ditëve nga paraqitja e kërkesës, duhet nxjerr një aktvendim për aprovimin ose refuzimin e kërkesës nga paragrafi 2. i këtij neni.

4. SEP duhet të informojë palën menjëherë për masat e ndërmarra.

5. Pala e pakënaqur me vendimin përfundimtar të SEP ka të drejtë të fillojë konflikt administrativ në gjykatën kompetente siç përcaktohet me ligj.

Neni 34

Korrigjimi i të dhënave dhe njoftimi

1. Të dhënat e pasakta korrigjohen në bazë të një procedure e cila përcaktohet me akt nënligjor të nxjerrë nga KGJK. Dokumentet mbështetëse për korrigjim regjistrohen dhe mbahen në dosje apo në ndonjë formë tjetër në arkiva të gjykatës.

2. Palët e interesuara mund të paraqesin kërkesë në SEP në qoftë se të dhënat e tyre kanë nevojë të korrigjohen. Pas korrigjimit të të dhënave penale, SEP do t'a njoftojë palën brenda afatit prej tridhjetë (30) ditëve.

3. SEP evidenton në sistem çdo ndërhyrje apo përditësim të të dhënave në regjistra.

KAPITULLI X

BASHKËPUNIMI ME INSTITUCIONET E TJERA

Neni 35

Bashkëpunimi i Agjencisë të Regjistrimit Civil me Departamentin e Sistemit të Evidencës Penale

1. Me qëllim të verifikimit të plotë të të dhënave personale të personave të dënuar, ARC i siguron departamentit të SEP-it qasje të drejtpërdrejtë në regjistrin civil të shtetasve të Republikës së Kosovës dhe personave të cilët kanë leje qëndrimi në Kosovë.

2. Numri personal i identifikimit do të konsiderohet informacion i detyrueshëm për personat fizikë për të gjitha çështjet penale në gjykatat e Kosovës.

Neni 36
SEP dhe Agjencia e Statistikave të Kosovës

SEP shkëmben të dhënat statistikore me Agjencinë e Statistikave të Kosovës, për nevoja të përdorimit në përputhje me legjislacionin përkatës në fuqi.

Neni 37
SEP dhe Agjencia e Regjistrimit të Bizneseve

1. Me qëllim të shkëmbimit të të dhënave për personat juridikë të dënuar, Departamenti i SEP-it dhe Agjencia e Regjistrimit të Bizneseve të Kosovës, sigurojnë rregullisht shkëmbimin e të dhënave për personat juridikë.

2. Numri unik identifikues (NUI) regjistrohet në regjistrat penal si informacion i detyrueshëm për personat juridikë në bazën e të dhënave në SEP. Ky numër përdoret për të gjitha dënimet e shqiptuara nga gjykatat e Kosovës.

Neni 38
Shkëmbimi ndërkombëtar i të dhënave të evidencës penale

Ministria e Drejtësisë siguron shkëmbimin e të dhënave të personave të dënuar me shtetet e tjera, në përputhje me legjislacionin përkatës në fuqi.

KAPITULLI XI
DISPOZITAT KALIMTARE DHE PËRFUNDIMTARE

Neni 39
Aktet nënligjore

1. Aktet nënligjore të përcaktuara në këtë ligj do të nxirren në afat prej gjashtë (6) muajsh pas hyrjes në fuqi të këtij ligji.

2. KGJK-ja në afat prej gjashtë (6) muajsh pas hyrjes në fuqi të këtij ligji funksionalizon dhe fillon mirëmbajtjen e regjistrave publikë të përcaktuar në nenin 20 të këtij ligji.

Neni 40
Dispozitat Kalimtare

1. Me hyrjen në fuqi të këtij ligji, SEP bën rehabilitimin ligjor për të gjithë personat e dënuar, të cilët janë të regjistruar në regjistër dhe që sipas ligjit do të duhej të ishin rehabilituar.

2. Përgjashtimisht nga paragrafi 1. i këtij neni, SEP siguron shlyerjen e të gjitha dënimeve të cilat i kanë përmbushur kushtet për rehabilitim ligjor.

3. Ndërveprimi midis SEP-it dhe SMIL krijohet në atë mënyrë që menjëherë sapo SMIL të jetë plotësisht funksional, regjistrimi i të dhënave penale të bartet automatikisht në bazën e të dhënave të SEP-it.

4. SEP përditëson të dhënat në regjistër duke siguruar që të gjithë personat e dënuar që sipas legjislacionit u takon e drejta e rehabilitimit të fshihen nga regjistri sipas detyrës zyrtare.

Neni 41
Shfuqizimi

1. Me hyrjen në fuqi të këtij Ligji, shfuqizohet Rregullorja nr. 11/2022 mbi evidencën penale në Republikën e Kosovës.
2. Me hyrjen në fuqi të këtij Ligji, shfuqizohet çdo dispozitë tjetër ligjore që përcakton nxjerrjen apo lëshimin e certifikatave që ndërlidhen me evidencën penale.

Neni 42
Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 08/L-194
26 tetor 2023

Shpallur me dekretin Nr. DL-179/2023, datë 15.11.2023 nga Presidentja e Republikës së Kosovës Vjosa Osmani-Sadriu